

TE HEHEURAA API.

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"Ia vai ora noa te aroha i te aau e tia'i ia tatou i te faa-ore atu i te hapa a to tatou taeae i ta'na fa'iraa mai; e ia faa-ore vave noa'tu tatou i te hapa a to tatou taeae e te hoê enemi noa'tu, hou oia i tatarahapa mai ai, e riro atoa te Atua i te aroha noa mai ia tatou."—Iosepha Semita te Peropheta.

Nu. 10.

10 Tiurai, 1908.

Mat. 1.

Te Sabati o te Evanelia Nei.

Ua uihia maira matou, to te Ekalesia a Iesu Mesia i te Feia Mo'a i te Mau Mahana Hopea Nei, i te mea i haapao ai matou i te mahana matamua o te hebedoma ei Sabati. Teie te pahonuraa: No te hoê ia faaueraa ta te Fatu i horoa mai i ta'na peropheta ra ia Iosepha Semita i nia i te hoê mahana Sabati, oia hoi, i te 7 no Atete 1831, i haapao ai matou i te mahana Sabati nei ei Sabati mau a te Fatu ra. Te na ô maira te reira parau heheu a te Fatu ra:

"E ia tia maitai ia oe iho, eiaha ia viivii i to te ao nei, e haere oe i te fare pureraa i to'u ra mahana mo'a a pûpû atu ai i ta oe ra tusia; oia mau hoi, o te mahana teie i faataahia ia faaea oe i ta oe ra mau ohipa, e ia haamori atu oe i te Tei Teitei ra, ia afai-atoa-hia râ ta oe ra mau opuaraa mai te parau-tia i te mau mahana atoa e i te mau taima atoa. A haamana'o râ oe e i teie nei mahana, te mahana a te Fatu, e pûpû ai oe i ta oe ra mau tusia e ta oe ra mau oroa ia'na, i te Tei Teitei ra, mai te fa'i i ta oe ra mau hara i to oe ra mau taeae e i mua i te aro no te Fatu." Buka Fa-fau 59: 9-12; B. F. S. 59: 2.

No teie nei faaueraa papu roa ta te Atua ora i heheu mai, i haapao ai matou i te mahana Sabati nei, no reira

aita roa'tu e tapitapiraa i te reira vahi a mârô noa'tu ai to te mau haapaoraa taata i teie nei parau.

Te na ô maira râ te hoê pŭpŭ taata, aita e tia ia ratou ia farii i te reira heheuraa apî, no te mea o te Bibilia ana'e ra maori ta ratou e tiaturi nei. Pahonoraa: Te tiaturi nei matou i ta te Bibilia e i ta te heheuraa apî atoa hoi; o te mea ia te reira i papu roa'e to matou faaroo nei, no te mea e Atua ora te Atua e e haamaramarama mai Oia, mai te parau hua mai i ta'na ra mau peropheta i te mau vahi poiri. O ta'na ravea maori te reira. Amo. 3: 7. Eph. 4: 11-13.

I roto i teie nei heheuraa i nia nei ua haapao-hua-hia te mahana matamua o te hebedoma ei Sabati mau, ei mono i te Sabati mahana hitu o te faufaa tahito, e ua au hoi te reira faaueraa i ta te Faufaa Apî.

Ua haapaohia Iesu ei upoo i nia iho i te mau mea atoa i te ekalesia nei, Eph. 1: 22; e o te Fatu atoa hoi Oia no te Sabati. Mar. 2: 27, 28. No reira e imi tatou i ta'na ohipa e ta'na haapiiraa no na mahana e piti, te mahana hitu e te mahana matamua. Eaha ta Iesu i rave i te Sabati mahana hitu? Pahonoraa: Ua faahapa Oia i te reira mahana: "Ua rahi roa maira to te ati Iuda titau ia'na e taparahi, Oia i faahapa i te Sabati." Ioa. 5: 18.

No te mea ua faahapa Iesu i te Sabati tahito, aita anei Oia i na muri i te faaite mai i te tahi atu â mahana? Ua na reira mai Oia. Te tatara maira Paulo i te parau no na mahana e piti i te na ôraa mai e: "Te na ô maira hoi Mose i te hoê vahi i te parau i te mahana hitu ra e, Faaea ihora te Atua i te mahana hitu i ta'na atoa ra mau ohipa." Heb. 4: 4. No te faaroo ore râ o Iseraela tahito aore ratou i ô i taua faaeearaa ra. "Ahiri hoi Iosua (Iesu) i horoa i te faaeearaa no ratou, e ore hoi te Atua e na muri i te faaite mai i te tahi â mahana." Heb. 4: 8.

Ua faaite mai râ Iesu i te tahi â mahana, no te mea, mai te Atua i faaea i ta'na ohipa i te hoê mahana, ua na reira atoa Iesu i te tahi â mahana, oia hoi te mahana matamua o te hebedoma. I te reira mahana hoi i upootia'i Oia i nia i te pohe e ua ô atu Oia i to'na ra faaeearaa. "E teie nei te vai ra maori te faaeearaa no te taata no te Atua." Heb. 4: 9. Eiaha te mahana hitu no te mea ua na muri te Atua i te faaite mai i te tahi â mahana. Heb. 4: 8. Te parau mai nei â te irava i raro a'e no to Iesu faaeearaa: "O

tei ô hoi i te faaeearaa o te Atua ra, ua faaea ia Oia (o Iesu) i ta'na atoa ra mau ohipa mai te Atua hoi i faaea i ta'na ra." Heb. 4: 10. Ua parauhia teie nei mahana faaeearaa apî ta Iesu i haapao, "Te mahana o te Fatu." Apo. 1: 10.

Ua faaite atea mai na te Atua i te vaha o Hosea peropheta ra e faaorehia ia te mahana Sabati o te ati Iuda, ua na ô maira hoi Hosea:

"E faaore atoa vau i to'na (to Iseraela) mau mea arearea, i to'na ra mau mahana oroa, to'na mau marama apî e to'na mau Sabati e to'na mau amuiraa rahi mo'a ra." Hosea 2: 11.

E ui tatou no teihea faufaa te ture no te Sabati i papaihia i te Exo. 20: 8-11? Pahonoraa: No te faufaa mata-mua ia, oia hoi, no na ture 10 ta te Atua i horoa mai ia Mose i te matamua, eiaha to te evanelia nei. Te na ô maira tei papaihia ra:

"Ua faaau mai to tatou Atua ra o Iehova i te faufaa ia tatou i Horeba. Aore Iehova i faaau mai i taua faufaa nei i to tatou mau metua (ia Adamu, Noa, Aberahama, e Iakoba) ia tatou nei râ, tatou atoa e ora nei i teie nei mahana." Deut. 5: 1-3.

Te faaite mai nei teie nei irava, aore te mau metua o Iseraela, (o Adamu, o Noa, o Aberahama, e o Iakoba) i ite i teie nei faufaa no reira mai te Sabati. Tauga faufaa nei o na ture 10 ia.

"Ua parau maira hoi Iehova ia outou i rotopu i taua auahi ra - - - e ua faaite maira Oia i ta'na ra faufaa ta'na i parau mai ia outou ia rave, i na parau hoê ahuru aore; e ua papai i hora hoi Oia i te reira i nia iho i na pāpā ofai e piti ra." Deut. 4: 12, 13, e te 5: 22. A hi'o atoa hoi i te haapapuraa i teie nei vahi i roto i te Exo. 34: 27, 28; e te Nehe. 9: 13, 14.

Na teie nei mau irava parau i nia nei e haamau maite i te parau ra e, aita roa'tu te mau taata i mua'tu i te tau no Mose i ite i teie nei ture no te Sabati, aore hoi te i'oa Sabati i faahitihia i mua'tu i te reira tau.

Eaha, aita anei Adamu ma e ta'na iho huaai i haapao i te mahana hitu ei Sabati? Aita roa ia. No te aha? No te mea aita te ture no te Sabati i horoahia'tu i to mua ia Mose, mai ta te mau irava i nia nei i faaite mai. A taio faahou na i taua mau irava ra. E no te mea hoi e, o te Atua ana'e e to te ra'i ra tei faaea i te mahana hitu, i te faaotiraa i ta te Atua ra mau ohipa; e taua mahana faaeearaa matamua no te Atua ra e 1000 ia matahiti i to tatou nei taioaraa 2 Pet. 3: 8. I roto i te ono o te mahana i ha-

(Salamo 90:4)

manihia'i Adamu ma e no reira aita'tura raua i ite i te hopea no taua mahana faaearea matamua a te Atua a pohe atu ai raua, aita hoi raua i tae i te 1000 matahiti i te oraraa. E no reira aita'tura Adamu ma i ite i te ture no te mahana hitu i te fenua nei, o Mose râ tei farii i te reira ture i te matamua ra.

Aita atoa Aberahama ma i ite i te faufaa matamua no reira mai te ture o te Sabati, o te ture evanelia râ ta ratou i ite e i haapao hoi hou te tuuraahia mai te ture o te Sabati, mai ta Paulo i faaite maira i roto i te Galasia pene 3 o te na ô maira:

Irava 8. "Ua faaite atea mai te parau i papaihia ra e e tiahia te etene e te Atua i te faaroo, i faaite ai i te evanelia ia Aberahama i mutaa ihora. 17. E teie nei, teie ta'u parau, o te faufaa o te Mesia i fafauhia (ia Aberahama) e te Atua i mutaa ihora, e ore e tia i te ture, a maha a'e-ra hanere e toru ahuru matahiti i tuuhia mai ai, ia faaore, a riro ai tei parauhia maira ei mea faufaa ore. 19. No te aha hoi te ture (i tuuhia mai ai)? I tuu-atoa-hia mai ai te reira no te hara. 23. I mutaa ihora aita te parau ra i te faaroo i itea mai, i tapeahia tatou i opanihia i roto i te ture e ia tae i te faaroo e faaitehia mai (e te Mesia) a muri atura. 24. Riro atura te ture ei orometua e aratai ia tatou i te Mesia ra ia faatiahia tatou i te faaroo. 25. Teie nei râ, ua itea mai te faaroo nei, aita'tura tatou i vaiihohia i raro a'e i te aratai."

To mna'tu ia Mose ua haapiihia te ture evanelia, eiaha na ture 10 ra mai tei faaitehia nei, no reira aita ratou i ite i te ture maha o te faufaa i tuuhia mai ia Mose e 430 matahiti i muri mai. E 430 m. i muri mai ia Aberahama a ora'i Mose ua taatihia mai te ture o te faufaa tahito i nia i te evanelia. No te aha? No te aau etaeta e te hara o te tamarai a Iseraela i taatihia mai ai. Gal. 3: 19. Ua riro te reira pueraa ture etaeta ei tairiraa ia papaihia Iseraela haapao ore. E huru ê roa to teie taatiraa nei e to te ture evanelia. O tei haamaau atu ua haamaau-atoa-hia mai oia, e mata ra ei mata ia, e niho ra ei niho ia. Lev. 24: 20. I te evanelia râ e faaho'ihia te aroha no te ino, e eiaha ei tahooraa'tu i tei hamani-ino mai. Mat. 5: 44.

Te mau ture 10 e to ratou mau utua i taatihia ra ua haapaohia ei faufaa mure noa; oia ia, ua tuuhia mai ei orometua e ei aratai ia Iseraela i te Mesia, e ia tae mau mai te Mesia ua haapaehia taua taatiraa nei, o taua aratai ia, e ua monohia te reira i ta Iesu haapiiraa. Ua hope roa taua faufaa matamua i te tupu ia Iesu e ua faatiahia te ture tahito i

ta'na haamauraa i te evanelia. Ua parau mai Paulo ia Iesu: "Inaha e tau Atua, te haere nei au e faatia i to oe hinaaro, ua faaore â ia Oia i tei mutaa ihora, ia faatia Oia i te piti." Heb. 10: 9. No te mau mea toe e te paruparu i te faufaa matamua i faaôhia mai ai te faufaa piti, oia hoi te mau ture o te faufaa mure ore. Heb. 8: 6, 7, e te 7: 12, 16-18. Te ture no te Sabati mahana hitu ua tuuhia mai i roto i te faufaa matamua ra o tei faatiahia e o tei faahopehia hoi ia Iesu, e tena na, e faafariu tia mai i to tatou mata ia Iesu ia maramarama tatou i ta'na haapiiraa.

Ua horoa mai Iehova i te Sabati ia Iseraela ei tapao faaite e ua fafau Oia i te faufaa ia ratou e na'na ratou i faataa i te mau nunaa ra. Exo. 31: 13. Eze. 20: 12. Ua haapao-atoa-hia te Sabati ei haamana'oraa no to ratou aratairaahia mai Aiphiti maira. Deut. 5: 15. Te ite nei tatou, aita te Sabati o te faaueraa maha i haapaohia ei ture tuutun ore no te mau tau atoa ra, no te mea: 1. No te taatiraa te reira i faaitesia i nia nei, o tei faatiahia e Iesu e aita hoi te reira ture i parau-faahou-hia mai e Iesu. 2. E tapao hoi te Sabati mai te peritome e tapao atoa ia. Gen. 17: 11. Ua faaorehia râ te peritome. Gal. 6: 15. Hoê faaoreraa i na tapao e piti ra i te tau no Iesu. 3. Ua faahapa Iesu i te reira mahana. Ioa. 5: 18. Tei ia'na hoi te parau no te reira mahana. 4. Aita Iesu e ta'na mau pipi i parau faahou mai i te hoê parau iti noa'e i te faaapîraa i te ture no te Sabati. Ahiri e ture mure ore te reira e te faufaa rahi, ua na reira mau ratou, mai ia Iesu i parau faahou mai i te tahi pae o te mau ture ma te faaore i to ratou mau utua. Mat. 5: 44; 19: 17-20. Ua māmû râ ratou atoa i te parau-faahou-raa i te reira ture.

E iva noa iho ture no roto i na ture 10 ta Iesu i faaapi mai, mai te faarue atu i te mau utua ri'ari'a tahito. Tei te Mat. 19: 17-20, e te 22: 35-40, e te 5: 44, ta Iesu parau-faahou-raa mai i na ture e iva o te faufaa tahito, e ua amuihia taua na ture e iva nei ei piti ture rahi o te evanelia, oia hoi, Aroha atu oe i to Atua ra, e e aroha atoa'tu oe i to taata tupu ra. Aita roa Oia i parau mai i te ture maha. Eaha Iesu i ore i parau faahou mai i te Sabati mahana hitu? No te mea ua haapao Oia i te tahi â mahana. A hi'o i te pae matamua o teie nei parau. E no te mea hoi no te faufaa tahito noa iho te reira ta Paulo i parau mai e, "Teie nei

râ ua itea mai te faaroo nei, aita'tura tatou i vaiihohia i raro a'e i te ture" e teie â hoi, "Aita outou i raro a'e i te ture, tei raro a'e outou i te aroha." Rom. 6: 14, 15; 3: 20.

I te Roma 13: 8-9, te haapapu ra Paulo i ta Iesu i haapii no te mau ture tahito, aore roa atoa oia i parau faahou mai i te ture no te Sabati tahito. Ua na ô maira râ oia i te tahi vahi:

"E ara, o te riro noa'tu outou i te parau paari e te haavare faufaa ore a te hoê taata'tu, mai te â rii a teie nei ao ra, - - - E tena na, eiaha ei taata e faahapa noa'tu ia outou i te maa i amuhia ra e tei inuhia ra, e te mahana oroa ra, e te avae apî, e te Sabati; e ata ana'e ia no te tupu a muri a'e; area te mea mau ra o te evanelia ia o te Mesia ra." Kol. 2: 8, 16, 17.

A taio atoa i ta Paulo parau i to Roma ei reira e papu roa'tu â te mana'o e, aita o te ture no te Sabati mahana hitu e mana i nia i te feia mo'a i te faufaa apî nei. Teie taua parau ra:

"Te mana'o nei te tahi, e huru ê to te tahi mahana i te tahi; te mana'o nei hoi te tahi, hoê â huru to te mau mahana atoa; ia papu râ te taata atoa i to'na ihora aau. O tei haapao i te hoê mahana ra, no te Fatu ia i haapao ai; e o tei ore e haapao i te mahana ra, no te Fatu ia i ore i haapao ai. Rom. 14: 5, 6.

Ahiri te vai mana noa nei â te ture o te Sabati tahito i te evanelia nei, e mana atoa nei â te utua no te haapao ore i te reira ture. I te tau a vai mana'i taua ture ra ua taparahi-pohe-roa-hia te taata o tei ofati i te reira. Exo. 35: 2. Ua pohe te ture no te Sabati tahito e to'na utua pohe atoa. Aita raua i taa ê i to raua ra oraraa, aita atoa raua i faataa-ê-hia i to raua ra poheraa. Ahiri te vai mana nei te ture tahito no te Sabati i teie nei â e mana atoa ia te ture no te Sabati matahiti e te matahiti iubili tei faaitehia i roto i te Lev. 25: 1-12. Na Iehova te mau haapaoraa atoa o te ture i faaite mai, e no reira eiaha te taata e parau mai e, e ere ia na Iehova te tahi pae ture, no te mea na Iehova i tuu mai i taua mau peu taatoa ia Iseraela.

E imi rii tatou i te huru no te mahana o te Fatu ta'na ihora i haapao mai tei faaitehia i nia nei. I te mahana matamua o te hebedoma i tia mai ai te Faaora mai te pohe mai, e ua faaite ia'na iho ia Maria Magadala, i na pue vahine êê, i na aposetolo e piti ra a haere atu ai raua i te oire

?
iti ra o Amausa, ia Petero a taa ê atu ai oia i te mau aposetolo hoê ahuru aore, e i na aposetolo hoê ahuru aore i te ahiahi o taua mahana ra; e ia amuihia ra, e pae a te Fatu faaiteraa ia'na iho i taua mahana hoê ra.

I to Iesu farereiraa i te ahuru aore aposetolo i taua ahiahi ra ua tuu atu Oia i te faaueraa ia ratou ia faaite haere atu ratou i te evanelia i te mau fenua atoa. Ioa. 20: 19-23. Mai reira'tu ua faataahia te reira mahana matamua o te hebedoma ei mahana haamoriraa ia haapaohia te mau faaueraa o te faufaa apî. Ua na reira te mau pîpî i te haapao i te reira mahana ei mahana vavahiraa pane e te a'oraa evanelia.

“E tae a'era i te mahana matamua o te hebedoma ra, ia haaputuputu mai te mau pîpî e vavahi i te pane ra, ua a'o atura Paulo ia ratou.” Ohi. 20: 7.

E faufaa rahi to teie nei irava i te mea te faaite mai nei te reira ua haapaohia to tatou nei Sabati ei haapaoraa i te i te mau oroa o te faufaa apî. Ua faariro-atoa-hia te reira mahana ei mahana aufauraa moni na te feia mo'a i te mau ekalesia i Galasia e i Korinetia. 1 Kor. 16: 1-2.

I riro Ioane pîpî here i te Varua i te mahana o te Fatu ra, e na'na hoi i haamairi i te mahana i tia mai ai te Fatu mai te pohe maira, te mahana o te Fatu ra. Apo. 1: 10. E mahana mo'a rahi teie i roto i te ohipa evanelia, i horoa mai ai te Fatu i te mau orama hanahana ia Ioane i taua mahana ra a haapae atu ai oia i te mahana hitu ra. Ua apiapi roa te Sabati mahana hitu i te mau peu o te ture tahito, aore roa hoi e ravea ia faaô i te mau ohipa evanelia i roto i te reira mahana, no reira e mea tia roa ia haapaohia te tahi atu mahana mai ta Iesu i haapao ra. No te nunaa ati Iuda ana'e te faufaa tahito, te faufaa apî râ no to te ao taatoa nei.

Ua parihia e, na Totatine Nui, te emepera no te hau Roma i ruri ê i te Sabati tahito, e ere râ te reira i te parau mau. Ia riro te ekalesia ei haapaoraa i faahereherehia e te hau i raro a'e ia Totatine ua faature oia i taua peu o te ekalesia ra ei ture no te hau, o Iesu râ e ta'na mau pîpî tei faatia ê na i taua mahana ra.

E faaotihia teie nei parau i te parau faaite a Justin Martyr, te hoê metua tuiroo no te ekalesia i muri mai rii i te poheraa o te mau aposetolo. Ua fanau oia i te m. 114 i muri a'e i te Mesia. E iti ia te reira i te 20 matahiti i muri

mai i ta Ioane papairaa i ta'na evanelia i te m. 98. I roto i ta'na buka (Apology) pene 67, te na ô maira oia:

"I nia i te mahana i parauhia te Sabati, e amui mai to te oire iho i te hoê vahi, e e na reira atoa to te mau mataienaa; ei reira e taiohia'i ta te mau aposetolo papairaa e ta te mau peropheta ra hoi e ia hope noa'tu te taime i faataahia ra; - - - Te Sabati râ o te mahana ia ta matou i haapao i to matou amuiraa; - - - No te mea ua faasataurohia Oia i te mahana i mua iho i to Saturn (to Saturn o te Mahana Maa ia i Tahiti nei) e i nia i te mahana i muri iho i to Saturn, oia hoi te mahana o te râ (te Sabati i Tahiti nei) i fa mai ai Oia i ta'na mau aposetolo e i te mau pîpî ma te haapiiraa mai ia ratou."

BUTERA.

Te Faaipoiporaa.

O vai te tumu no te faaipoiporaa? O te Atua ia, mai tei faaitehia, na ô maira: "E ua parau ihora te Atua ra o Iehova, E ere ia i te mea maitai ia parahi noa Adamu oia ana'e ra, e hamani au i te tahi tauturu au na'na ra." Gen. 2: 18.

E mau maite anei ta te Atua e rave ra? E mau maite hoi ta te Atua e rave ra, e no reira ia faaipoipohia te hoê taata e te mana o te autahu'araa mo'a e mau te reira taatiraa e a muri noa'tu. Kohe. 3: 14. I te tau no Aberahama aita e haapaeraa vahine; area râ no te mārû ore o te aau taata i tuu noa Mose i te haapaeraa vahine. Mat. 19: 4-8.

E faaipoiporaa anei e te horoaraa ia faaipoipohia i te tia-faahou-raa? Eita; eita ia e faaipoiporaa i te tia-faahou-raa, no te mea, ua haapao te Atua ia haamauhia te reira i roto i teie nei oraraa. Mai te mea aita te taata i faaipoipohia i roto i teie nei oraraa e te mana o te Atua no te pae varua, ia tae i te tia-faahou-raa e au ratou i te mau melahi o te ao ra. Ia faaipoipohia râ te taata e te mana o te Atua no te pae varua e au ratou i te peropheta. Mat. 22: 25-30; e te Luk. 13: 28. Ua horoa mai o Iesu i te mana no te haamauraa i te faaipoiporaa no te pae varua i te mau aposetolo i te na ôraa e, "Ta oe i haamau i raro nei, e haamau atoa-hia i te ao ra." Mat. 16: 19.

Ua hamanihia te vahine no te tane, eiaha te tane no te vahine; aita hoi te tane e taa ê i te vahine e te vahine i te tane i te Fatu nei. 1 Kor. 11: 9-11.

E haamaitai anei te Atua i te faaipoiporaa o te mau taata atoa ra? E, ua haamaitai te Atua i te faaipoiporaa o te taata atoa ra, oia hoi no te mau episekopo, te mau peresibutero, e te mau diakono, e mea viivii ore hoi te roi i te reira. Heb. 13: 4.

E mea tia roa anei ia faaipoipo te mau episekopo, te mau peresibutero e te mau diakono i te tau no Paulo? E mea tia hoi ia faaipoipo ratou atoa mai te au i te faaiteraa a Paulo, na ô maira: "Ei taata hapa ore râ te episekopo e tia'i, ei taata vahine hoê e te itoito; * * * ei taata a'o maitai i to'na iho utuafare, ma te tura, e ta'na tamarî i te auraro-maite-raa ia'na. E taata vahine hoê ana'e te mau diakono, e te a'o-maite-raa hoi i ta ratou tamarî e to ratou iho utuafare." 1 Tim. 3: 2, 4, 12. Tito 1: 5, 6.

Ua faaipoipo anei o Petero i te vahine? E vahine hoi ta Petero no te mea e metua hoovai vahine ta'na, oia hoi te metua vahine o ta'na vahine faaipoipo. Mat. 8: 14.

E vahine mau ta te tahi pae o te mau aposetolo o Iesu Mesia mai ta Paulo i faaite mai na ô maira: "Aita anei e tia ia matou ia aratai haere i te tuahine vahine mau ra, mai te tahi pae aposetolo atoa ra, e mai te mau taeae hoi o te Fatu ra, e mai ia Kepha." 1 Kor. 9: 5.

Eaha ta Paulo a'oraa'tu i te mau vahine apî ra? Teie ta'na a'o ia ratou, ia faaipoipo ratou e faafanau tama, e e haapao maitai i te utuafare. 1 Tim. 5: 14.

Na vai i faaore i te faaipoiporaa? Na te feia haavare i faaore i te faaipoiporaa mai te au i ta Paulo i faaite mai i te 1 Tim. 4: 1-3. I muri roa mai i te poheraa o te mau aposetolo ua tupu te haapiiraa e mea maitai a'e te faaipoipo ore i te faaipoipo. Ua mana'ohia hoi e, e ore te mau varua iino e faahema hua i têt parahi noa ma te faaipoipo ore; no reira aita te tahi pae orometua Katolika i faaipoipo i te matamua. I roto râ i te tenetere ahuru ma hoê ua faature etaeta te Pope teoteo rahi ra o Kerekorio VII i te reira peu. Mai reira mai ua mana noa na te reira ture faufau. E inaha noa nei â, teie te haapiiraa anore i teie nei, oia hoi, e huru hau a'e te parahi paretenia noa i te faaipoipo.

Eaha te mana'o tia no teie nei haapiiraa hopea? Pahonora: 1. E haapiiraa haavare ia mai te au i ta te Varua i faaite maira. 1 Tim. 4: 1-3. 2. Mai te mea ua parahi paretenia noa te taata atoa i te haapao-tamau-raa i teie nei

haapiiraa apî e mou roa ia te taata nei i te hopea mai o te ui hoê. Eiaha e vare i te haapiiraa e e huru maitai a'e te parahi paretenia noa ra i te faaipoipo, no te mea e ere ia i ta te Atua; e mana'o noa iho râ no te taata ta te hoê ekalesia i faateitei i nia a'e i te a'o a te Atua ra. 1 Kor. 7: 6, 12, 25.

E mea titau-hua-hia te faaipoiporaa e te Atua ei faaore i te taoto noa e te faaturi; e tena na, a ara mai, e taua taata faaipoipo-ore-hia ra e! A faaoti atu i to oe apiti-mau-raa i te hoê tauturu au na oe ra. BUTERA.

Na Poheraa e Toru.

CLAUS CLAUSEN (TAUTANI).—Ua pohe oia i te ma'i i te 30 no Eperera i Borabora. E taata Denmark oia e ua bapetizohia i roto i te ekalesia nei i te 28 no Atete 1900 e Iakoborometua (C. J. Hansen) i Borabora. E Porosetani oia i to'na apîraa, area râ i to'na paariraa ua hi'opoa maite oia i te mau ekalesia e no to'na mana'o papu e tei te Ekalesia a Iesu Mesia nei te ora, ua tomo mai oia e ua pohe atoa oia i roto i te faaroo nei.

VEROHIA A TAMAKU. —Ua pohe oia i te ma'i i Takaroa i te pae hopea no Me. I vai ma'i na oia i na avae a pohe atu ai; ua faaoromai râ oia i to'na ma'i rahi. E diakono itoito oia e tae noa'tu ua rave mai te Fatu ia'na.

TEHAVARU A TIMOE. —Ua pohe oia i te 14 no Tiunu i Takaroa i te 52 o to'na ra matahiti. Te mau ra oia i te toroa peresideni no te pûpû diakono i te amaa i Takaroa a pohe ai oia; e ua riro oia ei hi'oraa maitai i mua i te mau diakono apî o te amaa ra. Te na ô maira te Fatu ra no tei pohe: "E ao to te feia i pohe ma te faaroo i te Fatu e pohe ai ra mai ô nei atu, ia tae mai te Fatu, e ia haamouhia te mau mea tahito ra, e ia faaapîhia te mau mea atoa, e tia mai ratou mai te pohe mai e e ore ratou e pohe faahou a muri atu, e noaa hoi te a'ia ia ratou i mua i te Fatu i roto i te oire mo'a." B. F. 63: 49. B. F. S. 63: 13.

E 93 milioni maile te atea o te mahana i te fenua nei.

E 8,000 maile te meumeu o te fenua nei, e 25,000 maile te haaatiraa.

Te Mau Parau Api.

Te haere nei te hoo no te faraoa i nia i te mau fenua ra i Niu Zilani, i Aataralia e i Beritane.

Te papaihia na te parau faaanu i ropu i te hau Amerika e te hau Iapone i te faaiteraa 'tu e e faahauhia to raua mârôraa na roto i te parau a te tiri-punaraa teitei no te mau fenua rarahi o te ao nei.

Tei te fenua ra o Niu Zilani i tere ai te hoê pahi auahi, o Muritai to'na i'oa, i nia i te ofai i te 27 no Me. Ua puta roa oia e ua tamauhia i nia i te ofai. Ua ora te taata paatoa no nia ia'na.

Te faaineine nei e 5000 taata i te fenua ra o Beritane ia haere i Autaralia e rave i te ohipa tai'a. E tapunu ratou i te i'a ei hoo atu i te mau fenua. Te mana'o nei ratou e e vahi maitai roa Autaralia no taua ohipa ra.

Tei Manila te ma'i uira i teie nei, e e rave rahi te taata i pohe roa i reira. No te mea te ama noa na te mori i te hoê fare mori i te ao, ua imihia te tumu aore i tinaihia te mori ia ao, e ua itea e ua pohe roa i te reira ma'i e pae taata haapao i taua fare mori ra.

I roto i te avae Novema i mua nei e maitihia te tahi Peresideni no te hau Amerika. O Roosevelt te i'oa o te Peresideni o tei faatere i te hau i na matahiti e vau i mairi a'enei; aita râ oia e faatia ia haamau-faahou-hia te toroa peresideni i nia ia'na e no reira e maitihia te tahi taata.

I te pae hopea no Me ua haere atu te Peresideni no te hau Farani, o Fallieres, i Beritane e ua farerei raua o Eduara VII, te arii no Beritane. E farereiraa mahanahana ta to Beritane i tuu mai i te Peresideni no Farani e ua mauruuru roa oia e to'na mau ee i to ratou fariiraahia. Te hau nei Farani e Beritane, e e riro â taua farereiraa nei ei haapapuraa i te hau i ropu ia raua.

Ua faatitiaa na opupu mata'i e 30 no te hau Farani e no te hau Beritane i te 31 no Me. I roaa te rê i te hoê opupu mata'i no Beritane. E piti vahine mataro no te mau taata i nia i taua opupu ra. Aore roa te taata mataitai i haapao i te mata'u, i onoono râ ratou i te haere horo patete i nia i te mau opupu i taua faatitiauaraa ra, e ua faaite i te moni ei hoo i te parahiraa i roto i te mau opupu, aita râ ratou i faatiahia.

I te mahana 13 no Tiurai nei e haamatahia i te oroa rahi no te hau Farani i Papeete nei, ei te tuira po i te 16 e faaoti-roa-hia'i. I te 13 te tatauraa vaa faaunauna etc. I te 14 te faahanahanaraa e te mau arcarea rii e rave rahi, te tuuraa uairao, e te turamaraa. I te 15 te tatauraa himene, te faatitiauaraa boti, e te mau vaa etc. I te 16 te oriraa Tahiti, te

tufaaraa rê na tei rê i te pupuhiraa tapao e tei rê hoi i te himeneraa, etc. Ua haapaohia te mau rê na te mau huru peu atoa ra.

Ua putuputu te mau taata e rave rahi i te faaiteraa ohipa i faanehe-
nehehia i Lonedona i te 27 no Me. Tei reira te arii no te hau Beritane, te
Peresideni no te hau Farani e te tahi atu â mau taata toroa rahi. Ua hau
te tahi mau ohipa i te nehenehe i tei faaitesia i te mau matahiti i mairi
a'enei, e te mana'ohia ra e e riro taua mau mea ra ei faaitoitaraa i te
taata i roto i te mau toroa ohipa.

Ua opuahia e te hau Beritane te hoê faatereraa apî, oia hoi te tauiraa
i te mau orometua hau o te fenua metua e to te mau fenua aihuaraau. E
tonohia te mau orometua atoa no te mau fenua aihuaraau i te fenua metua
i Beritane ia haapii i to reira mau tamarii, e e haere te mau orometua o te
fenua metua i te mau fenua aihuaraau e haapii atu ai. E na reira ratou
i te faaitoitaito i te ohipa haapiiraa tamarii.

No te hinaaro o na Tinito e 12 ia mămă to ratou tarahu i nia i te pe-
reoo auahi ua ô ratou i roto i te mau afata taihaa, e ua patitihia te mau
afata e to ratou mau hoa. Ua hopoihia ratou no te fenua Teta e tae noa
atu i te fenua Niu Yoka i Amerika. I te taeraa'tu i reira ua iritihia taua
mau afata ra e o te tino pohe ana'e ia tei iteahia i roto ra. No te iti o te
apoo mata'i i vaiihohia e to ratou hoa i pohe roa'i ratou.

Mea paari roa te tahi mau taata orure hau i Rusia. Ua tuuhia ratou
i roto i te fare tapearaa; i tauturuhia râ ratou e te mau hoa no rapae, o tei
tuu i te topita i roto i te hoê farii tei i te û. Ia hopoihia te û i roto i te
fare e faainu ia ratou, ua iriti mai ratou i te topita e taora'tura i te pae
fare. Ua parari roa'tura taua fare ra e ia pupuhihia na taata tia'i e piti,
ua horo noa te mau taata orure hau e 18 i rapae e tae noa'tura i te tahi
mau vahi tapuniraa.

I te m. 1906 ua inu to Beritane i e 33,891,101 paero bea, e 39,302,402
galani ava, e 12,328,691 galani uaina e e 15,000,000 galani no te tahi atu
mau huru ava taero. Ahiri ua manihia teie nei mau inuraa taero atoa ei
roto ava hoê, e tia ia haapanuhia e 100 noa'tu pahi tama'i rarahi i roto ra.
Ia tufaa-maite-hia teie nei ava atoa na nia i te feia atoa, te tamarii aruaru
e te taata paari, no Beritane, e 30 galani ta ratou tufaa tataihoê e ati noa
a'e, e te hoo no te tufaa hoê ra e 18 ia dara moni piru. Ua hau te moni i
pau i te ava i tei pau i nia i te ohipa haapiiraa tamarii. "O te opu hoi to
ratou atua." Phil. 3: 19.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank Cutler, Imprimeur,

Rue Bréa et de la rue Dumont d'Urville, Papeete, Tahiti.